



Broj: 05/1-50-13-29-27-4/16
Sarajevo, 7.12.2016.

IZVJEŠTAJ

sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s rukovodstvom Direkcije za koordinaciju policijskih tijela BiH

Sastanak je održan 16.11.2016., s početkom u 14 sati, u prostorijama Direkcije za koordinaciju policijskih tijela BiH u Sarajevu. Prisustvovali su: Mirsad Vilić, direktor Direkcije za koordinaciju policijskih tijela BiH, Mile Jurić, zamjenik direktora Direkcije za koordinaciju policijskih tijela BiH, Žiko Krunić, predsjednik Nezavisnog odbora, Enes Obralića, prvi zamjenik predsjednika Nezavisnog odbora, Nikola Džambas, član Nezavisnog odbora, te Ivana Lovrić, sekretar Nezavisnog odbora.

Direktor Direkcije za koordinaciju policijskih tijela BiH Mirsad Vilić poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Žiko Krunić, predsjednik Nezavisnog odbora, kratko je obrazložio razlog posjete. Rekao je da je posjeta organizirana u skladu s Planom i programom rada Nezavisnog odbora za 2016. godinu s ciljem održavanja kontinuiteta saradnje s policijskim agencijama iz svoje nadležnosti.

Direktor Direkcije za koordinaciju policijskih tijela istakao je da je trenutno u Direkciji popunjeno 841 radno mjesto (753 policijska službenika, 44 državna službenika i 44 zaposlenika), a Pravilnikom o unutrašnjoj organizaciji i sistematizaciji Direkcije predviđeno je 1.268 radnih mjesta (1.135 policijskih službenika, 74 državna službenika i 59 uposlenika). Također, naglasio je da je u toku procedura odabira 55 kadeta od kojih je 50 u činu "policajac" i 5 u činu "mlađi inspektor". Budući da Direkcija ima stalni odliv zaposlenih, uglavnom radi odlaska u penziju, ovakvom praksom zapošljavanja svake godine Direkcija bi bila u mogućnosti u potpunosti izvršavati zadatke iz svoje nadležnosti.

Dalje, u razgovoru u kojem su učestvovali svi prisutni članovi Nezavisnog odbora direktor Direkcije naglasio je kako ima izuzetno dobru saradnju s drugim policijskim agencijama u BiH kada su u pitanju borba protiv terorizma, korupcije i dr.

Naglasio je i da je na snazi i u praksi se primjenjuje Sporazum o međusobnom pružanju pomoći i operativnoj saradnji agencija za provođenje zakona na području Kantona Sarajevo koji je potpisan između sljedećih policijskih agencija: Direkcije za koordinaciju policijskih tijela BiH, Državne agencije za istrage i zaštitu BiH, Granične policije BiH, Federalnog

ministarstva unutrašnjih poslova – Federalna uprava policije i Ministarstva unutrašnjih poslova Kantona Sarajevo.

Rukovodstvo Direkcije za koordinaciju policijskih tijela BiH upoznao je članove Nezavisnog odbora i o tome da svakodnevno sačinjavaju bilten dnevnih događaja u kojem sve policijske agencije u BiH kao i Ministarstvo sigurnosti BiH i Službu za poslove sa strancima informiraju o najznačajnijim sigurnosnim događajima iz prethodnog dana.

Također, uspostavljen je sistem elektronske razmjene podataka iz evidencija policijskih tijela i Tužilaštva.

Kada je riječ o komunikaciji i saradnji na međunarodnom planu, direktor je istakao da se posredstvom Direkcije za koordinaciju policijskih tijela BiH odvija saradnja s Interpolom, Europolom i Seicom. Naglasio je da je na zahtjev međunarodnih i domaćih policijskih agencija samo u ovoj godini zaprimljeno i obrađeno 7.112 predmeta, a koji su se odnosili na terorizam, korupciju, privredni kriminal, trgovinu ljudima, trgovinu oružjem i drogama i dr.

Direktor Direkcije informirao je članove Nezavisnog odbora i o tome da odlukama Vijeća ministara BiH Direkcija vrši fizičku i tehničku zaštitu osoba i objekata. Trenutno Direkcija štiti 27 osoba na nivou BiH, što podrazumijeva pravo na zaštitu 24 sata dnevno i u BiH i u inozemstvu.

Također, direktor je informirao članove Nezavisnog odbora i o tome da je Vijeće ministara donijelo Odluku da se na lokaciji Zrak u Buča Potoku izgradi sjedište Direkcije za koordinaciju policijskih tijela BiH i za to osiguralo sredstva od 3 mil. KM.

Predsjednik Nezavisnog odbora Žiko Krunić se u razgovoru s rukovodstvom Direkcije za koordinaciju policijskih tijela BiH osvrnuo i na nemile događaje i pitanja eventualne odgovornosti za propuste u organizaciji osiguranja skupa u Memorijalnom centru Potočari 11.7.2015. Direktor je obavijestio članove Nezavisnog odbora da je ovaj predmet u nadležnosti Državne agencije za istrage i zaštitu BiH.

Na kraju su članovi Nezavisnog odbora naglasili da će Nezavisni odbor i dalje, u okviru svojih nadležnosti, pružati podršku radu Direkcije za koordinaciju policijskih tijela BiH i poželjeli im mnogo uspjeha.

Sastanak je završen u 16 sati.

**PREDSJEDNIK
NEZAVISNOG ODBORA**

Žiko Krunić